

Barnabas wys op nuwe lewenstyl met 10 geloofsgewoontes

Barnabas

'n Nuwe manier van leef

Chris van Wyk | Nico Simpson | Frederick Marais

Aantal bladsye: 112

Verkoopprys: **R64,95**

Barnabas is 'n volgende publikasie in die reeks van publikasies wat deur die Seisoen van Luister geïnisieer is.

In die vorige produkte van die Seisoen van Luister het die skrywers veral gekonsentreer op die *luisterproses* self.

In hierdie Bybelstudieboek fokus die skrywers nou op die lewenstyl wat tot stand kom in die beweging na ander mense toe. Dit is nie genoeg om net tot *rus* te kom voor God en na Hom en ander te luister nie – die eerste beweging van die luistersiklus; dit is nie genoeg om net sy stem te *hoor*, ook in dié van ander, en daardeur geruk of getroos te word nie – die tweede beweging van die luistersiklus. Dit moet altyd ook lei tot 'n nuwe manier van *leef*, 'n nuwe lewenstyl – die derde beweging van die luistersiklus.

Die verhaal van Barnabas

Die skrywers gebruik weer eens 'n meesterverhaal, dié keer nie 'n hoofstuk of boek in die Bybel nie, maar 'n karakter in die Nuwe Testament, Barnabas. Barnabas is een van die onvertelde en onderskatte verhale in ons Bybelse biblioteek. Hy is egter by uitstek iemand wat wys hoe 'n lewenstyl gevorm word deur die geestelike gewoontes wat jy beoefen:

- Die Here kon Barnabas se dankoffer gebruik om die eerste gemeente finansiëel te bemoedig en te laat oorleef. Sonder sy *vrygewigheid* sou die gemeente baie moeilik 'n basis kon wees vir die eksponensiële groei van die koninkryk in die eerste paar dekades van ons jaartelling.
- Die kerk kon Saulus en sy bediening aanvaar danksy Barnabas wat hom *gasvry* ontvang het en só vir Saulus as borg in die eerste gemeente opgetree het. Daarsonder sou die kerk baie maklik eksklusief-Joods kon bly en kon kies om nie grense na ander oor te steek nie.

- Die jong Johannes Markus het in Barnabas 'n begeleier en mentor van formaat gevind wat hom deur sy gawe van *bemoediging* in staat te stel om nie net uiteindelik met Paulus te versoen nie, maar ook die eerste en oudste evangelie te skrywe.

Barnabas het 'n fenomenale bydrae tot die eerste kerk en die vestiging van die koninkryk gemaak. Woorde ontbreek eintlik om sy bydrae na waarde te skat.

Hy was veral 'n bemoediger, in so 'n mate dat dit sy bynaam geword het. Hy was 'n borg vir Saulus, 'n brugbouer in Antiogië, 'n bemagtiger van Saulus as leraar, 'n pionier-bedienaar van die evangelie aan die heidene en 'n bobaas-begeleier van jong gelowiges.

Barnabas is dus vir almal van ons 'n voorbeeld van iemand wat sy arsenaal van gawes – bemoediging, vrygewigheid, gasvryheid, begeleiding – tot voordeel van die kerk en in diens aan die Here aangewend het. Hy illustreer vir ons hoe 'n Christelike lewenstyl werk.

Praktiese geestelike gewoontes

Een van die maniere waarop die kerk deur die eeue hierdie Christelike lewenstyl aangeleer en gekoester het, was deur *praktiese geestelike gewoontes*, of soos baie dit noem, *geestelike dissiplines* of *geloofsgewoontes*. Dit is eenvoudige oordraagbare tegnieke wat in die beoefening en bemeestering daarvan jou lewe vorm en Christus gestalte laat kry in jou (Gal 4:19). Met geestelike gewoontes leer 'n mens 'n kant van die Christelike lewe ken wat jy nie kan leer net deur boeke te lees of aan die voete van geleerdes te sit nie. Dit is kennis wat net deur ervaring onder begeleiding van die Heilige Gees oopgesluit kan word (1 Kor 2:13). Dit is *in die beoefening* van die geestelike gewoontes wat 'n mens dié kennis opdoen, op geen ander manier nie.

Hierdie Bybelstudieboek (wat uit tien sessies bestaan) fokus op tien sulke gewoontes en word aan die verhaal van Barnabas gekoppel. Die tien geestelike gewoontes is (met die gewoonte waarop dit gebaseer is en waarmee dit verband hou in Engels): Vrygewigheid (stewardship); Gasvryheid (hospitality); Bemoediging (compassion); Omgee (service, mercy); Daaglikse ondersoek (daily examination); Getuienis (witness); Nederigheid (humility); Gemeenskap (community); Geloofsonderskeiding (discernment); Lewenspraktyk (rule for life).

